

金匱要略直解

金匱要畧直解

下卷

南陽張

機仲景述

新安程

林雲來註

錢塘薛盛豐汝楫較

嘔吐噦下利病脉證治第十七

夫嘔家有癰膿。不可治嘔。膿盡自愈。

內經曰。熱聚於胃口而不行。故胃脘爲癰也。夫癰潰則爲膿。膿出必令嘔。故不必治其嘔。膿盡則嘔自止也。

先嘔却渴者。此爲欲解。先渴却嘔者。爲水停心下。此屬飲家。

先嘔却渴者。爲嘔後而胃無津液。得水和之卽愈。先渴却嘔者。本渴而飲水。水停胃中作嘔也。故屬水飲。

嘔家本渴。今反不渴者。以心下有支飲故也。此屬支飲。

嘔家本亡津液。故渴。今嘔而不渴。必水飲作嘔也。

故屬支飲。

問曰。病人脉數。數爲熱。當消穀引食。而反吐者何也。
師曰。以發其汗。令陽氣微。膈氣虛。脉乃數。數爲客熱。
不能消穀。胃中虛冷故也。

經曰。邪熱不殺穀。實熱則消穀善饑。今病人脉雖
數。以發汗則表中之陽微。膈中之氣損。是數爲客
熱。不能消穀而反吐也。經曰。數爲虛。數爲寒。胃中
陽微而成虛冷。是以不納穀也。

脉弦者。虛也。胃氣無餘。朝食暮吐。變爲胃反。寒在於上。醫反下之。今脉反弦。故名曰虛。

弦爲減陰脉也。陽虛而陰勝。胃中真陽已虧。不能消磨水穀。是以朝食而暮吐。變爲胃反。此證乃寒在於上。法當溫之。反下之。復損胃中之陽。陰寒獨勝。故脉弦也。

寸口脉微而數。微則無氣。無氣則榮虛。榮虛則血不足。血不足則胸中冷。

經曰。寸口諸微亡陽。微而數。虛脉也。此宗氣衰微。榮衛并損。大氣不能搏於胸膈。故令病者胸冷。欲作吐證。

跌陽脉浮而濇。浮則爲虛。虛則傷脾。脾傷則不磨。朝食暮吐。暮食朝吐。宿穀不化。名曰胃反。脉緊而濇。其病難治。

經曰。跌陽脉浮而濇。知脾氣不足。胃氣虛也。夫浮爲虛。濇爲血不足。跌陽得之。必知脾氣不治。華佗

白。脾主消磨水穀。聞聲則動。動則磨胃而主運化。
今胃能納而脾不能磨。則胃中之穀必不能消。是
以朝食而暮吐。暮食而朝吐。爲胃反之證也。脈緊
而瀉胃已無陽。脾爲死陰。故云難治。

病人欲吐者不可下之。

欲吐病屬上焦也。故不可下。按欲字作吐而未吐
之義。當是寒在上焦。使人溫溫欲吐也。

藏而腹滿。視其前後。知何部不利。利之卽愈。

噦而腹滿。必有水穀停留於腸胃而不去。或小便不利。或大便不行。視其前後以利之。則病尋愈。嘔而胸滿者。茱萸湯主之。

茱萸湯方

吳茱萸 一升
人參 三兩
生薑 六兩

大棗 十二枚

右四味。以水五升。煮取三升。溫服七合。日三服。寒在上則胸滿。茱萸生薑以散胸滿。嘔多者則傷

胃。人參大棗以補脾胃。

乾嘔吐涎沫頭痛者。茱萸湯主之。

脾主涎。脾寒不能攝涎。故嘔吐涎沫也。頭痛者。氣逆於上也。用茱萸湯以溫脾止嘔。

嘔而腸鳴心下痞者。半夏瀉心湯主之。

半夏瀉心湯方

半夏

半升洗

黃芩

乾薑

人參

各二兩

黃連

一兩

大棗

十二枚

甘草 三兩

右七味。以水一斗。煮取六升。去滓。再煮取三升。溫服一升。日三服。

嘔而腸鳴。心下痞者。此邪熱乘虛而客於心下。故用黃芩黃連以泄心熱。除痞。半夏乾薑以散逆止嘔。內經曰。脾胃虛則腸鳴。又曰。中氣不足。腸爲之苦鳴。人參大棗甘草用以補中而和腸胃。

乾嘔而利者。黃芩加半夏生薑湯主之。

金匱要略直解 卷一 五
黃芩加半夏生薑湯方

黃芩 三兩

甘草 二兩炙

芍藥 二兩

半夏 半升

生薑 三兩

大棗 十二枚

右六味以水一斗煮取三升去滓溫服一升日再夜一服。

乾嘔者無物嘔出也。中焦不和則氣逆於上而作嘔。迫於下而為利。故用半夏生薑入上焦以止嘔。甘草大棗入中焦以和脾。黃芩芍藥入下焦以止

利。如是則正氣安而邪氣去。三焦和而嘔利止。
諸嘔吐穀不得下。小半夏湯主之。

方義見痰飲中。

嘔吐而病在膈上。後思水者解。急與之。思水者。猪苓
散主之。

上章言先嘔却渴。此爲欲解。今嘔吐而病在膈上。
後思水者解。亦與上證不殊。故急與之以和胃。然
思水之人。又有得水而貪飲。則胃中熱少。不能消

水更與人作病。故思水者。用猪苓以散水飲。

猪苓散方

猪苓

茯苓

白朮

等分

右三味杵爲散。飲服方寸匕。日三服。

二苓以利水飲。白朮以止嘔吐。

嘔而脉弱。小便復利。身有微熱。見厥者難治。四逆湯主之。

寒在上則嘔。寒在下不能制水。則小便還利。脉弱

者陽微也。陽微則不能衛外。其身但有微熱而已。
熱既已微。而又手足厥冷。則諸陽之本已絕。故云
難治。

四逆湯方

附子一枚生用 乾薑一兩半 甘草二兩炙

右三味。以水三升。煮取一升二合。去滓。分溫再
服。強人可大附子一枚。乾薑三兩。

神農經曰。療寒者以熱藥。內經曰。寒淫於內。治以

甘熱。四逆湯者。辛甘大熱之劑也。故用附子以回陽散厥。乾薑以去寒止嘔。甘草以調和血脈。嘔而發熱者。小柴胡湯主之。

經曰。嘔而發熱者。柴胡湯證具。夫嘔家未有發熱者。以發熱屬半表半裏。故與小柴胡湯以和之。

小柴胡湯方

柴胡

半斤

黃芩

三兩

人參

三兩

甘草

三兩

半夏

半升

生薑

三兩

大棗 十二枚

右七味。以水一斗二升。煮取六升。去滓。再煎取三升。溫服一升。日三服。

此邪氣逆於表而作嘔。如桂枝湯鼻鳴乾嘔相類。故以小柴胡湯解表。邪熱去而嘔亦止。

胃反嘔吐者。大半夏湯主之。

大半夏湯方

半夏 二升 洗
完用人參 三兩
白蜜 一升

右三味。以水一斗二升。和蜜。揚之二百四十遍。
煮藥取二升半。溫服一升。餘分再服。

夫脾傷則不磨。朝食暮吐。暮食朝吐。變爲胃反。故
靈樞經曰。太陰爲開。開折。則倉廩無所輸。膈洞。內
經曰。洞者。食不化。下嗑還出。大半夏湯者。補脾止
嘔藥也。虛者補以人參之甘。嘔者散以半夏之辛。
水性本寒而體重。揚之則甘而輕。同白蜜之潤利。
使其透膈而達脾。則倉廩之官。得輸運之職。而無

反胃之患矣。

食已卽吐者。大黃甘草湯主之。

大黃甘草湯方

大黃

四兩

甘草

一兩

右二味。以水三升。煮取一升。分溫再服。

內經曰。諸逆衝上。皆屬於火。食已卽吐。必胃熱上逆。而不能容食。與反胃寒嘔水飲不同。故用是湯以平胃熱。內經曰。陽蓄積病。苑而陽氣當隔。隔者

當瀉。大黃之苦以瀉之。苦走下。腕而不留。用甘草之甘以緩之。所謂高者抑之。病在上取之下也。

王宇泰曰。病人欲吐者不可下之。又用大黃甘草治食已即吐。何也。曰。欲吐者其病在上。因而越之可也。而逆之使下。則必抑塞憤亂而益以甚。故禁之。若既已吐矣。吐而不已。有升無降。則當逆而折之。引令下行。無速於大黃。故不禁也。

胃反吐而渴欲飲水者。茯苓澤瀉湯主之。

反胃。則胃中津液乾。故渴欲引飲。以胃弱不能消水。則水飲易停。用茯苓澤瀉湯以散水飲。

茯苓澤瀉湯方

茯苓 半斤

澤瀉 四兩

甘草 二兩

桂枝 二兩

白朮 三兩

生薑 四兩

右六味。以水一斗。煮取三升。內澤瀉。再煮取二升半。溫服八合。日三服。

此方乃五苓散去猪苓。加甘草生薑。以猪苓過於利水。故去之。甘草生薑。長於和胃止吐。故加之。茯苓白朮澤瀉桂枝。相領宣導。補脾而利水飲。

吐後渴欲得水而貪飲者。文蛤湯主之。兼主微風脉
緊頭痛。

此證貪飲。與上證欲飲水。猪苓散之思水不同。夫
貪飲者。飲水必多。多則淫溢上焦。必有溢飲之患。
故用此湯以散水飲。方中皆辛甘發散之藥。故亦
主微風脉緊頭痛。

文蛤湯方

文蛤 五兩

麻黃

甘草

生薑 三兩

石膏 五兩

杏仁 五十個

大棗 十二枚

右七味以水六升煮取二升溫服一升汗出卽愈。

此大青龍湯去桂枝加文蛤水停於裏文蛤之鹹寒可以利水而消飲水溢於外青龍之辛熱可以勝濕而解表此湯與茯苓澤瀉湯猪苓散皆預防水飲之劑。

乾嘔吐逆吐涎沫半夏乾薑散主之。

半夏乾薑散方

半夏

乾薑

等分

右二味杵爲散取方寸匕漿水一升半煎取七

合頓服之

脾寒則涎不攝胃寒則氣上逆故乾嘔吐涎沫也

半夏之辛以散逆乾薑之熱以溫脾煎以漿水者

籍其酸溫以通關利膈也

此證與茱萸湯迥別以不頭痛也

病人胸中似喘不喘。似嘔不嘔。似噦不噦。徹心中憤憤然無奈者。生薑半夏湯主之。

生薑半夏湯方

半夏半斤 生薑汁一升

右二味以水三升煮半夏取二升內生薑汁煮取一升半。小冷分四服。日三夜一服。止停後服。胸中似喘不喘。似嘔不嘔。似噦不噦。必有寒邪上逆於胸膈。故使人煩憤不寧。無可奈何之狀。用半

夏之辛以散之。薑汁之辛以潤之。內經曰。若調寒熱之逆。冷熱必行。則熱物冷服。下豎之後。冷體既消。熱性便發。由是病氣隨愈。嘔噦皆除。情且不違。而致大益。故令小冷服之。則憤憤然無奈之邪。得之而自散。或曰。上證半夏乾薑湯。似與此方不殊。而證治頗異。何耶。蓋乾薑佐半夏以溫脾胃。故令頓服。留於胃中。今生薑佐半夏以除煩逆。故分四次令散胸膈。方法寧有越制者哉。

乾嘔噦若手足厥者。橘皮湯主之。

橘皮湯方

橘皮

四兩

生薑

半斤

右二味以水七升。煮取三升。溫服一升。下咽卽愈。

乾嘔噦則氣逆於胸膈間而不行於四末。故手足爲之厥。橘皮能降逆氣。生薑爲嘔家聖藥。小劑以和之也。然乾嘔非反胃。厥非無陽。故下咽氣行卽

愈。

噦逆者。橘皮竹茹湯主之。

橘皮竹茹湯方

橘皮 三斤

竹茹 二升

大棗 三十枚

生薑 半斤

甘草 五兩

人參 一兩

右六味以水一斗煮取三升。溫服一升。日三服。

內經曰。胃爲氣逆爲噦。上證但乾噦而未至於逆。

今噦逆者。卽內經所謂諸逆衝上。皆屬於火。胃虛。

而熱乘之。作噦逆者。歟。夫除胃熱而專主嘔。必
以竹茹爲君。橘皮下逆氣爲臣。生薑止嘔逆爲佐。
人參甘草大棗。用以緩逆爲使。

大六府氣絕於外者。手足寒。上氣脚縮。五藏氣絕於
內者。利不禁。下甚者。手足不仁。

手足寒者。陽不行於四末也。上氣者。宗氣衰微也。
平人宗氣積於胸中。出於喉嚨。以貫心脉而行呼
吸。宗氣衰。則奔促上氣也。脚縮者。寒主收引。無陽

以伸也。此六府氣絕於外者如此。下利不禁者。下焦不闔也。脾衰則四藏俱衰。故經曰。脾氣孤弱。五液注下。下焦不闔。清便下重。卽不禁之謂也。下甚而至於手足不仁者。四體絕也。此五藏氣絕於內者如此。

論曰。平人六腑氣旺。合衛氣以流行於一身。護皮毛。溫手足。奚病焉。惟夫病久損深。六腑之氣漸絕。或暴病虛脫。眞陽已亡。則衛氣無所稟受。而與之。

俱絕手足之寒宜矣。陽氣一亂則氣逆上而不平。無陽養筋則脚攣縮而不伸。此證之極危。陽氣已絕故也。或又言常見人有手足寒氣逆上脚拘攣。治之得愈。毋亦腑氣絕而猶有可救者歟。曰此非腑氣絕也。證雖相似而實殊者也。按內經有言。陽氣衰於下者爲寒厥。陰氣衰於下者爲熱厥。手足寒乃厥證也。經言不得卧而息有音者。陽明之脉逆也。起居如故而息有音者。肺之絡脉逆也。是上

氣逆也。又言濕熱不攘，大筋軟短，小筋弛長，軟短爲拘，弛長爲痿，脚縮者，濕熱病也。茲三者皆非氣絕也，乃暴病有餘之證也。邪火陰寒之所爲也。故觀茲證者，當以脉辨之。陽絕之脉，必漫如滴水，浮如蛛絲，或散或微或絕，豈若三證有餘之脉，神氣猶存者乎？平人五藏氣旺，榮氣主維於其內，故血液充，陰精固，大便潤，小便長，奚病焉？惟夫火邪燔熾，而五臟齊枯，五行相剋而亡傳者，死。此五藏

之氣絕也。五藏既絕，則榮衛無所管攝而陷下，不禁在勞病則腸垢虛脫，在惡利則洞泄不收，血氣虛陷，手足自爾不仁。此證之極危，陰氣已絕故也。或又言曾見痢疾，每下百度，晝夜無休，完穀不化，下體麻木。治之可生，毋亦藏氣絕而猶有可救者歟？曰：此非藏氣絕也。證雖相似，而實殊者也。此人春夏受熱，藏於藏腑，復出腸胃，火性暴烈，卒迫後重，河間所謂火性疾速，不容停畱，胃中者是也。其

完穀不化非胃氣絕也。仲景所謂邪熱不殺穀者是也。下體雖麻木而猶未至於手足之不仁。不仁則并麻木而不知也。勢雖急而猶未至不禁。不禁則上無脹悶。中無痛楚。下無奔迫。但孔如竹筒。漫無約束。直流不休。訶子栗殼咸無功矣。雖有虛扁將安施乎。

以上二病證雖相似而虛實死生誠爲不同。辨之不可不精。

利脈沉弦者下重。脈大者爲未止。脈微弱數者爲

欲自止。雖發熱不死。

沉弦者陰脉。陰勝則寒。寒則令人下重。內經曰。脉大則病進。故爲未止。微弱者。寒邪去。數者。陽氣復。是爲欲止也。內經曰。腸澼便血。脉懸絕身熱者死。今脉微弱而不懸絕。雖發熱亦不死也。

下利手足厥冷無脉者。灸之不溫。若脉不還。反微喘者死。

下利一證。俱從傷寒治法。故寒證十居其八。必得

身微熱。脉微數。方愈。今下利而至於手足厥冷。無脉。則獨陰無陽。灸之以復其陽。而脉絕不來。反微喘者。則正氣又脫於上。孤陽無根。故死。

少陰負趺陽者爲順也。

少陰勝趺陽。是水行乘土。名曰橫。橫者。橫逆之義。若少陰負趺陽。則土能制水。微邪不能乘所不勝。雖下利亦爲順也。

下利有微熱而渴。脉弱者。今自愈。

下利大熱而渴。則偏於陽。無熱不渴。則偏於陰。皆不能愈。以微熱而渴。知陰陽和。脉弱知邪氣去。故卽自愈。

下利脉數有微熱。汗出。今自愈。設脉緊爲未解。

寒則下利。脉數有微熱。則裏寒去。汗出則表氣和。表裏俱和。故今自愈。設復緊者。知寒邪尚在。是爲未解也。

下利脉數而渴者。今自愈。設不差。必清膿血。以有熱

故也

脉數而渴。則寒邪去而利當止。經曰。若脉不解而
下不止。必挾熱而便膿血。此有熱陷於下焦。使血
流腐而爲膿也。

下利脉反弦。發熱身汗者自愈。

脉弦爲寒。發熱則陽氣復。汗出則寒邪去。故知自
愈。

下利氣者。當利其小便。

下利氣者。謂氣陷於大腸。鬱滯窘迫。久利則有之。但利小便以導氣前行。則腸自寬而利自止。

下利寸脉反浮數。尺中自濇者。必清膿血。

寸脉浮數爲熱有餘。尺脉自濇爲血不足。以熱有餘。則挾熱而便膿血。

下利清穀。不可攻其表。汗出必脹滿。

寒不殺穀。寒勝則下利清穀也。若發其表。汗出則胃中之陽益虛。其寒益勝。故作脹滿。

下利脉沉而遲其人面少赤身有微熱下利清穀者必鬱冒汗出而解病人必微厥所以然者其面戴陽下虛故也

脉沉遲者寒勝於裏面少赤身微熱者格陽於表唯其裏寒則陽氣不能溫裏逼熱外出而爲戴陽內則下利清穀也鬱冒則陽入之陰陰出之陽陰陽和而汗出解也經曰諸乘寒者則爲厥鬱冒不仁今病人微厥以鬱冒之餘陽氣未行於四末面

赤爲戴陽。下利爲下虛。故令微厥也。

下利後脈絕。手足厥冷。晡時脈還。手足溫者。生。脈不還者。死。

脈絕者。正氣隨利而脫。手足亦厥冷也。周時脈當復。而手足當溫。若脈不還。則生機已絕。故死。

下利腹脹滿。身體疼痛者。先溫其裏。乃攻其表。溫裏宜四逆湯。攻表宜桂枝湯。四逆湯方見上

下利腹脹滿。爲寒勝於裏。身疼痛。爲寒勝於表。表

裏有邪。故宜先溫裏以止利。後攻表以散邪。

桂枝湯方

桂枝

三兩去皮

芍藥

三兩

甘草

三兩炙

生薑

三兩

大棗

十二枚

右五味咬咀。以水七升。微火煮取三升。去滓。適寒溫服一升。服已。須臾啜稀粥一升。以助藥力。溫覆令一時許。遍身漰漰微似有汗。益佳。不可令如水淋漓。若一服汗出病差。停後服。

下利三部脉皆平。按之心下堅者。急下之。宜大承氣湯。

下利三部脉皆平。則裏無偏寒偏熱之邪。但心下堅而實未去。故急與大承氣湯下其實。

下利脉遲而滑者。實也。利未欲止。急下之。宜大承氣湯。

脉遲尚未可攻。遲而滑。滑則爲實矣。雖利未止。亦急以大承湯蕩其實。而成通因通用之劑。

下利脉反滑者當有所去下乃愈宜大承氣湯。

經曰滑爲有宿食故當下去之而利自愈。

下利已差至其年月日時復發者以病不盡故也當下之宜大承氣湯。

六淫之邪皆令人病利利止而邪未盡留於腸胃中。至其年月日時則淫氣觸動內邪其病復作以脾主信故也下之以去其不盡之病。

下利譫語者有燥屎也小承氣湯下之。

實則譌語。有燥屎者。自可除下之。故用小承氣湯以蕩滌腸胃。

小承氣湯方

大黃

四兩

厚朴

三兩炙

枳實

大者三枚炙

右三味。以水四升。煮取一升二合。去滓。分溫二服。得利則止。

下利便膿血者。桃花湯主之。

桃花湯方

赤石脂

一斤一半剉
一半篩末

乾薑

一兩

粳米

一升

右三味以水七升。煮米令熟。去滓。溫七合。內赤石脂末方寸匕。三服。若一服愈。餘勿服。

夫挾熱則純便膿血。下利而便膿血。則非挾熱可知。故用桃花湯以止之。重能走下焦。瀉能止寒滑。赤石脂沉瀉甘溫藥也。乾薑用以散裏寒。粳米用以和腸胃。瀉以去脫之劑也。中病即止。故一服愈。

餘勿復服。

熱利下重者。白頭翁湯主之。

白頭翁湯方

白頭翁 三兩

黃連

黃檗

秦皮 各三兩

右四味以水七升。煮取二升。去滓。溫服一升。不
愈更服。

熱利下重。則熱客於腸胃。非寒不足以除熱。非苦

金匱要略卷之八
不足。以堅下焦。故加一熱字。別已上之寒利。
下利後更煩。按之心下濡者。爲虛煩也。梔子豉湯主
之。

更煩言本有煩。不爲利除而轉甚也。若按之心下
鞭爲實。當下之。心下濡而煩者。因下利後胃中空
虛。客氣動膈。爲虛煩也。與梔子豉湯以吐虛煩。

梔子豉湯方

梔子 十四枚

香豉 四合 綿裹

右二味。以水四升。先煮梔子得二升半。內豉煮取一升半。去滓。分二服。溫進一服。得吐則止。

內經曰。酸苦涌泄爲陰。涌吐虛煩。必以苦爲主。是以梔子爲君。煩爲熱勝也。湧熱者。必以苦勝熱者。必以寒。香豉苦寒。佐梔子以吐虛煩。

下利清穀。裏寒外熱。汗出而厥者。通脈四逆湯主之。下利清穀。必寒勝於內。而格陽於外。故爲裏寒外熱。汗出則外熱去而亡陽。亡陽則厥也。通脈四逆

湯以復脉救厥回陽止利。

通脉四逆湯方

附子

大者一枚生用

乾薑

三兩強人可四兩

甘草

一兩炙

右三味以水三升煮取一升二合去滓分溫再服

厥甚者脉必絕附子辛熱用以復脉回陽下清穀者胃必寒乾薑辛溫用以溫胃止利甘草甘平用以佐薑附之熱而回厥逆。

下利肺痛紫參湯主之。

紫參湯方

紫參

半斤

甘草

三兩

右二味以水五升。先煮紫參取二升。內甘草煮取一升半。分溫三服。疑非仲景方。

肺痛未詳。或云肺痛當是腹痛。以紫參能治心腹積聚故也。

氣利訶梨勒散主之。

訶梨勒散方

訶梨勒 十枚煨

右一味爲散。粥飲和頓服。

寇宗奭曰。訶梨勒能瀉便而又寬腸。瀉能治利。寬腸能治氣。故氣利宜之。調以粥飲者。藉穀氣以助腸胃也。

論曰。仲景治氣利用訶梨勒散。詳其主治。不知其義。及後讀杜壬方。言氣利裏急後重。始知訶梨勒

用以調氣。蓋有形之傷。則便垢而後重。無形之傷。則氣墜而後重。便腸垢者。得諸實氣下墜者。得諸虛。故用訶梨勒溫瀉之劑也。唐貞觀中。太宗苦氣利。衆醫不效。金吾長張寶藏。以牛乳煎葷撥進。服之立差。葷撥溫脾藥也。劉禹錫傳信方。治氣利用礬石。礬石亦瀉氣藥也。大都氣利得之虛寒。氣下陷者多。其用溫瀉之藥。可見矣。

瘡癰腸癰浸淫病脉證并治第十八

諸浮數脉應當發熱而反洒淅惡寒。若有痛處當發其癰。

浮爲風數爲熱。風熱相搏則發熱也。而反灑淅惡寒。若有痛處則風熱稽留於肉理。敗肉腐肌而爲癰腫。

師曰諸癰腫欲知有膿無膿以手掩腫上熱者爲有膿不熱者爲無膿。

靈樞經曰榮衛稽留於經脉之中則血滯而不行。

不行。則衛氣從之而不通。壅遏而不得行。故熱大
熱不止。熱勝則肉腐。腐則爲膿。故知熱聚者則作
膿。熱未聚者。但腫而未作膿也。皆以手掩知之。

腸癰之爲病。其身甲錯。腹皮急。按之濡如腫狀。腹無
積聚。身無熱。脉數。此爲腸內有癰膿。薏苡附子散
散主之。

癰生於內。則氣血內歸而爲膿。不能外出以養肌
肉。故肌肉爲之枯皴。內既有癰。則外不可以目察。

故腹皮但急內則可以手按。故有濡如腫狀也。脉數者。當內有積聚而外有熱。今內無積聚而外又無熱。則數脉者必生惡瘡。故知內有腸癰之患。

薏苡附子敗醬散方

薏苡仁 十分
附子 二分

敗醬 五分

右三味杵爲末。取方寸匕。以水二升。煎減半。頓服。小便當下。

薏苡利腸胃。敗醬除癰腫。附子破癰堅。三味爲排

膿散腫之劑

腸癰者。少腹腫痞。按之卽痛如淋。小便自調。時時發熱。自汗出。復惡寒。其脉遲緊者。膿未成。可下之。當有血。脉洪數者。膿已成。不可下也。大黃牡丹湯主之。

腫則形於外。痞則着於內。少腹旣已痞腫。則腸癰已成。故按之卽痛也。如淋者。以小腹爲厥陰經脉所過。厥陰脉循陰器。故按少腹而痛。引陰莖。有如淋狀。而小便則自調也。靈樞經曰。有所結。氣歸之。

內既有癰。則榮衛稽留於內。而不衛外。故令有發熱汗出惡寒也。脉遲緊者。則熱未聚而肉未腐。故宜大黃牡丹湯下之。以消其腫瘍。若脉洪數。則膿已成。將成潰瘍。不可下也。大黃牡丹湯。在當有血句下。以古人爲文法所拘。故綴於條末。傷寒論中多有之。按上證癰在小腸。以小腸在上。癰近於腹。則位深。但腹皮急。而按之有如腫形。故用前湯導其毒從小便而出。此證癰在大腸。以大腸在下。

大劑歟前三味燒灰者。以灰得火極則鹹。鹹能凝血。黑能止血也。產後可服者。以產後無非血證。方中皆止血藥也。

浸淫瘡從口流向四肢者可治。從四肢流來入口者不可治。

經曰病在外者可治。入裏者卽死。此之謂也。

浸淫瘡黃連粉主之。方未見

跌蹙手指臂腫轉筋陰狐疝魫蟲病脉證治第

十九

師曰。病趺蹷其人但能前不能却。刺膕入二寸。此太陽經傷也。

說文曰。蹷。僵也。趺。足背也。趺蹷。卽痺厥之屬。但能前不能却。形容其脚面拘急。行步不隨之狀也。然足趺屬足陽明。不應取太陽穴。而靈樞經有曰。下氣不足。則爲痿厥心忤。取足外踝下留之。亦太陽申脉穴也。今刺膕入二寸有誤。按明堂圖膕上承

山刺七分。飛陽刺三分。當是臑下二寸爲附陽穴。明堂止刺五分。以治痿厥風痺不仁。而附陽又爲陽驕之郄。刺之正所以治跌蹙而使足躡捷也。

病人常以手指臂腫動。此人身體潤潤者。藜蘆甘草湯主之。

證未詳。方亦缺。

轉筋之爲病。其人臂脚直。脉上下行。微弦。轉筋入腹者。鷄屎白散主之。

臂脚直者轉筋而手足有強直之象。脉上下行者脉類長大。長大微弦是筋病而見肝脉也。若轉筋入腹則用鷄屎白散以治之。

鷄屎白散方

鷄屎白

右一味爲散。取方寸匕。以水六合和溫服。

肝之合筋也。其畜鷄也。以鷄屎而治轉筋。猶以猪膚而治下利。所謂同氣相求。衰之以屬是也。白者。

雄鷄所便也。能消積下氣。故岐伯用之以治鼓脹。心腹滿。夫轉筋入腹。必腹滿疼痛。雖與鼓脹腹滿不侔。藉其臭腐攻伐腹中邪氣。則一也。

陰狐疝氣者。偏有大小。時時上下。蜘蛛散主之。

靈樞經曰。肝足厥陰之脉。所生病者。狐疝。以狐日伏夜出。而疝處厥陰肝經之分。陰篡隱奧之所。故以狐疝名之。偏有大小者。舉丸有偏小偏大也。足厥陰之別者。上舉以筋脉牽引。舉丸則上施縱。則

下。故有時時上下也。甲乙經曰。陰跳遺溺。陰上下入腹中。取之大敦。又曰。男子陰疝兩丸上下。取之五樞。皆取肝膽二經也。

蜘蛛散方

蜘蛛

十四枚
熬煎

桂枝

半兩

右二味爲散。取八分。一匕飲和服。日再服。蜜圓亦可。

別錄云。蜘蛛治大人小兒瘰癧。瘰癧。癰也。其性有毒。服

之能使人利有誅之義也。得桂枝引入厥陰肝經而治狐疝。夫肝臭臊而狐氣極臊烈。藉其氣以誅之。用其毒以下之。後人治狐腋臭亦用蜘蛛以下其毒。皆此意也。

問曰病腹痛有蟲。其脉何以別之。師曰腹中痛其脉當沉若弦反洪大故有虵蟲。

痛在於腹則脉沉弦。今蟲動於膈則脉洪大以此別之。

虻蟲之爲病令人吐涎心痛發作有時毒藥不止甘草粉蜜湯主之。

巢元方曰虻蟲長五寸至一尺發則心腹作痛口喜唾涎及清水貫傷心則死靈樞經曰蟲動則胃緩胃緩則廉泉開故涎下是以令人吐涎也心痛者非虻蟲貫心乃虻蟲上入胃脘卽痛下入胃中卽止是以發作有時也若毒藥不能止用甘草粉蜜湯從其性以治之。

甘草粉蜜湯方

甘草 二兩

粉 一兩

蜜 四兩

右三味以水三升先煮甘草取二升去滓內粉蜜攪令和煎如薄粥溫服一升差卽止。

凡蟲在腹中。旬頭向上。中旬向中。下旬向下。服藥當於初四五日五更時則易効也。虵得甘則頭向上。若毒藥不能止則從其性而引之。伏其毒以殺之。故引以白蜜甘草之甘。殺以鉛粉之辛。亦始同。

而終異也。

虵厥者當吐虵令病者靜而復時煩此爲藏寒虵上入膈故煩須臾復止得食而嘔又煩者虵聞食臭出其人當自吐虵虵厥者烏梅丸主之。

經曰病人有寒胃中冷必吐虵是虵厥爲藏寒也。與烏梅丸以溫胃安虵。

烏梅丸方

烏梅 三百個 細辛 六兩 乾薑 十兩

黃連 一斤
當歸 四兩
附子 六兩炮

川椒 四兩去汗
桂枝 六兩
人參

黃蘗 各六兩

右十味。異搗篩合治之。以苦酒漬烏梅一宿。去核蒸之。五升米下。飯熟。擣成泥。和藥令相得。內臼中。與蜜杵二千下。圓如梧子大。先食飲服十圓。日三服。稍加至二十圓。禁生冷滑臭等食。虵得酸則止。得苦則安。得甘則動於上。得辛則伏。

於下。稟至酸之味者烏梅。故用之以止虵。稟冲和之氣者人參。故用之以安胃。凡藥之辛者能殺蟲。蜀椒乾薑細辛是也。藥之苦者能安虵。黃連黃檗是也。當歸入榮。桂枝走衛。同附子出入榮衛而溫藏寒。

婦人妊娠病脉證并治第三十

師曰。婦人得平脉。陰脉小弱。其人渴不能食。無寒熱。名妊娠。桂枝湯主之。於法六十日當有此證。設有醫

治逆者。却一月。加吐下者。則絕之。

婁全善曰。絕之者。謂絕止醫治。候其自安也。嘗治一二婦。阻病吐。愈治愈逆。因思仲景絕之之旨。遂停藥月餘。自安。然此證有缺文。

婦人宿有癥病。經斷未及三月。而得漏下不止。胎動在臍上者。爲癥痼害。妊娠六月動者。前三月經水利。時胎也。下血者。後斷三月。卽也。所以血不止者。其癥不去故也。當下其癥。桂枝茯苓丸主之。

金匱要略卷之九
此有瘕病而懷胎者。雖有漏血不止。皆瘕瘕之爲害。非胎動胎漏之證。下其瘕瘕。妊娠自安。此內經所謂有故無殞。亦無殞也。其義如此。中有缺文。

桂枝茯苓丸方

桂枝

茯苓

牡丹

桃仁

去皮尖
熬

芍藥

各等分

右五味末之。煉蜜和丸。如兔屎大。每日食前服一丸。不知加至三丸。

牡丹桃仁以攻癥瘕。桂枝以和衛。芍藥以和榮。茯苓以和中。五物相需。爲治妊娠有癥瘕之小劑。婦人懷娠六七月。脉弦發熱。其胎愈脹。腹痛惡寒者。少腹如扇。所以然者。子藏開故也。當以附子湯溫其藏。方未見

胎脹腹痛。亦令人發熱惡寒。少腹如扇者。陰寒勝也。妊娠陰陽調和。則胎氣安。今陽虛陰盛。不能以絢固胞胎。故子藏爲之開也。附子湯用以溫經。

師曰。婦人有漏下者。有半產後因下血都不絕者。有妊娠下血者。假令妊娠腹中痛爲胞阻。膠艾湯主之。漏下者。妊娠經來。脉經以陽不足。謂之激經也。半產者。以四五月而墮胎。胎墮必傷其血海。血因續下不絕也。若妊娠下血。腹中痛爲胞阻。則用膠艾湯以治之。

芩歸膠艾湯方

芩窮

阿膠

甘草

各二兩

艾葉

當歸 各三兩
芍藥 四兩

乾地黄

右七味。以水五升。清酒三升。合煮取三升。去滓。
內膠令消盡。溫服一升。日三服。不差更作。

膠艾主乎安胎。四物主乎養血。和以甘草。行以酒
勢。血能循經養胎。則無漏下之患。

婦人懷娠。腹中疴痛。當歸芍藥散主之。

當歸芍藥散方

當歸 三兩

芍藥 一斤

茯苓 四兩

白朮 四兩

澤瀉 半斤

芎藭 半斤一作三兩

右六味。杵爲散。取方寸匕。酒和。日三服。

疝痛。急痛也。懷娠者。以血爲主。歸。芍藥。養血而兼止腹痛也。腹中無因而作痛。或邪熱所干。或胎氣壅盛。用茯苓之淡。以滲之。澤瀉之鹹。以泄之。白朮之甘。以補之。和以酒服者。藉其勢以行藥力。日三服。則藥力相續。而腹痛自止也。

妊娠嘔吐不止。乾薑人參半夏丸主之。

乾薑人參半夏丸方

乾薑

人參 各兩

半夏 二兩

右三味。末之。以生薑汁糊爲丸。如梧子大。飲服十三丸。日三服。

寒在胃脘則令嘔吐不止。故用乾薑散寒。半夏生薑止嘔。人參和胃。半夏乾薑能下胎。婁全善曰。余治妊阻病。累用半夏。未嘗動胎。亦有故無殞之義。

臨病之工何必拘泥。

妊娠小便難。飲食如故。當歸貝母苦參丸主之。

當歸貝母苦參丸方

當歸

貝母

苦參

各四兩

右三味末之。煉蜜丸如小豆大。飲服三丸。加至十丸。

妊娠便難。必無氣以化。當歸辛潤。能致津液通氣。此妊娠者所宜。貝母主淋瀝。苦參主逐水。三味相

須爲君一臣二之奇制。

妊娠有水氣。身重小便不利。洒淅惡寒。起卽頭眩。葵子茯苓散主之。

妊娠有水氣者。由氣虛不能以通調水道。下輸膀胱。但停滯而小便不利。土又不能勝濕。故令身重也。內經曰。太陽爲諸陽主氣。其脈行諸表而上頭。氣虛則頭眩。又不能以衛外。故令洒淅惡寒。利小便。則諸證自愈。

葵子茯苓散方

葵子一斤 茯苓三兩

右二味。杵爲散。飲服方寸匕。日三服。小便利則愈。

葵子之滑可以利竅。茯苓之淡用以滲泄。二物爲利水之輕劑。

婦人妊娠宜常服當歸散主之。

當歸散方

當歸

黃芩

芍藥

芩薊

各一斤 白朮 半斤

右五味杵爲散。酒飲服方寸匕。日再服。妊娠常服。卽易產。胎無疾苦。產後百病悉主之。

任衝盛。則胞胎得以養。當歸芩薊芍藥。益任衝藥也。黃芩主淋露下血。白朮益津液。暖胃。凡胎孕宜清熱涼血。血不妄行。乃能養胎。黃芩乃上中二焦藥。能降火下行。則胎自安矣。白朮補脾燥濕。脾土

健運則能化精微取汁而爲血。自無惡阻嘔吐之患矣。故丹溪以芩朮爲安胎聖藥也。

妊娠養胎白朮散主之。

白朮散方

白朮

芩朮

蜀椒 三分去汗

牡蠣

右四味杵爲散。酒服一錢匕。日三服。夜一服。但苦痛加芍藥。心下毒痛倍加芩朮。心煩吐痛不

能食飲。加細辛一兩。半夏大者二十枚。服之後
更以醋漿水服之。若嘔。以醋漿水服之。復不解
者。小麥汁服之。已後渴者。大麥粥服之。病雖愈。
服之勿置。

白朮主安胎爲君。芩薊主養胎爲臣。蜀椒主溫胎
爲佐。牡蠣主固胎爲使。按瘦而多火者宜用當歸
散。肥而有寒者宜用白朮散。不可混施也。芍藥能
緩中。故苦痛者加之。芩薊能溫中。故毒痛者倍之。

痰飲在心膈。故令心煩吐痛。不能食飲。加細辛破
痰下水。半夏消痰去水。更服漿水以調中。若嘔者。
復用漿水服藥以止嘔。嘔不止。再易小麥汁以和
胃。嘔止而胃無津液作渴者。食大麥粥以生津液。
病愈服之勿置者。以大麥粥能調中補脾。故可常
服。非指上藥可常服也。

婦人傷胎懷身。腹滿不得小便。從腰已下重。如有水
氣狀。懷身七月。太陰當養。不養。此心氣實。當刺瀉勞

宮及關元小便微利則愈。

七月子太陰肺經養胎。金爲火乘。則肺金受傷。而胎失所養。又不能通調水道。故有腹滿不得小便。從腰已下有如水氣狀也。勞宮穴在手心。厥陰心主穴也。瀉之則火不乘金矣。關元穴在臍下。爲小腸之募。瀉之則小便通利矣。此穴不可妄用。刺之能落胎。

婦人產後病脈證治第二十一

問曰。新產婦人有三病。一者病瘧。二者病鬱胃。三者大便難。何謂也。師曰。新產血虛多汗出。喜中風。故令病瘧。亡血復汗。寒多。故令鬱胃。亡津液胃燥。故大便難。

產後頭項拘急。口噤背反張者。爲瘧。以新產營虛。衛氣鬱盛。衛氣慄悍。但開其腠理。則汗易出。而風寒易入。故令病瘧。產後血暈者。爲鬱胃。又名血厥。經曰。諸乘寒者。則爲厥。鬱胃不仁。以亡血復汗。則

陽又虛。陽虛則寒。故令鬱冒。大便難者亡血。則虛。其陰汗出則虛。其陽陰陽俱虛。則津液內竭。腸胃乾燥。故大便難。此新產婦人有三病也。

產婦鬱冒。其脈微弱。嘔不能食。大便反堅。但頭汗出。所以然者。血虛而厥。厥而必冒。冒家欲解。必大汗出。以血虛下厥。孤陽上出。故頭汗出。所以產婦喜汗出者。亡陰血虛。陽氣獨盛。故當汗出。陰陽乃復。大便堅。喘不能食。小柴胡湯主之。病解能食。七八日更發熱。

者此爲胃實大承氣湯主之。

小柴胡湯方見嘔吐大承氣湯方見腹滿

產婦陰陽俱虛故令鬱冒而脉微弱上焦未和故令嘔不能食腸胃乾燥故令大便秘結孤陽上越故令頭汗出鬱冒者何也新產血虛虛則與陽氣不相順接故厥厥而必冒經曰胃家汗出自愈所以然者汗出表和故也是以胃家欲解必大汗出也但頭汗出者何也以產後血虛陰氣竭於下則厥孤陽越於上則頭汗出也所以產婦喜汗出者以

陰血消亡。陽氣獨勝。孤陽但開其表。故喜汗出。汗出則陽虛。陰陽俱虛。故令鬱冒。汗出陰陽乃復也。大便堅者。胃中乾燥。嘔不能食者。上焦未和。與小柴胡和其陰陽。則嘔止能食。但大便堅而七八日更發熱者。經曰。發熱者屬胃也。此爲胃實。故用大承氣湯下之。

產後腹中疝痛。當歸生薑羊肉湯主之。并治腹中寒疝。虛勞不足。方見寒疝

產後血虛有寒則腹中急痛內經曰味厚者爲陰
當歸羊肉味厚者也用以補產後之陰佐生薑以
散腹中之寒則疴痛自止夫辛能散寒補能去弱
三味辛溫補劑也故并主虛勞寒痺

產後腹痛煩滿不得卧枳實芍藥散主之。

枳實芍藥散方

枳實

燒令黑
勿大過

芍藥

等分

右二味杵爲散服方寸匕日五服并主癰膿以

麥粥下之

枳實除煩滿。芍藥止腹痛。痛止滿除。自能卧也。又
枳實長肌肉。芍藥消癰腫。大麥壯血脈。故并主癰
腫。

問曰。芍藥酸寒。丹溪謂伐生氣之原。產後禁用。而
陽旦湯中不離芍藥。然則去之可乎。曰。仲景治產
後腹痛。不得卧。用枳實芍藥散。何獨陽旦湯。然則
則仲景非耶。夫東風生木。木乃生酸。木居五行之

先酸爲五味之長乃天地生化之府萬物資始之
元反稱酸伐生氣不知其言見何經據後世遵奉
而不知非者何也

師曰產婦腹痛法當以枳實芍藥散假令不愈此爲
腹中有乾血着臍下宜下瘀血湯主之亦主經水不
利

產婦腹痛用上藥而不愈者則痛非煩滿此有乾
血着於臍下故令腹痛也宜下瘀血湯

下瘀血湯方

六黃 三兩

桃仁 二十枚

蟅蟲

二十枚
熬去足

右三味末之煉蜜和爲四丸以酒一升煎一丸
取八合頓服之新血下如豚肝

蟅蟲主下血閉。能軟堅也。大黃主下瘀血。苦能
泄滯也。桃仁亦下瘀血。滑以去着也。三味相合以
攻臍下乾血。

產後七八日。無太陽證。少腹堅痛。此惡露不盡。不大

便煩躁發熱切脉微實。再倍發熱。日晡時煩躁者。不食。食則譫語。至夜卽愈。宜大承氣湯主之。熱在裏結在膀胱也。

太陽傷寒。熱結膀胱。則蓄血。小腹堅痛。今產後非太陽證。而小腹亦堅痛者。此惡血未盡。熱在裏結在膀胱也。宜下瘀血湯。若不大便煩躁發熱。則熱不在膀胱。而熱在胃。切其脉亦微實也。日晡時陽明自王時也。當自王時。是以再倍發熱煩躁。則

胃中實矣。胃實則不能食。故食則譫語轉增其實也。宜大承氣湯下之。此條前後簡錯。熱在裏入字當在惡露不盡之下。未有大承氣湯而下膀胱血結也。至夜卽愈四字。衍文。脉經無。

產後風續之數十日不解。頭微痛。惡寒。時時有熱。心下悶。乾嘔。汗出。雖久。陽旦證續在耳。可與陽旦湯。

卽桂枝湯
方見下利

產後中風。雖有數十日不解。其表證仍在者。亦當

與陽旦湯也。

產後中風發熱面正赤喘而頭痛竹葉湯主之。

風邪留於肌膚則發熱怫鬱於上則面赤而頭痛故與竹葉湯以散之。

竹葉湯方

竹葉 一把

葛根 三兩

防風

桔梗

桂枝

人參

甘草 各一兩

附子 一枚炮

大棗 十五枚

生薑

五兩

右十味。以水一斗。煮取二升半。分溫三服。溫覆使汗出。頸項強。用大附子一枚。破之如豆大。前藥揚去沫。嘔者。加半夏半升。洗。

產後血虛。多汗出。喜中風。故令翕。今證中未至。背反張。而發熱。面赤。頭痛。亦風。之漸。故用竹葉。主風。防風。治內。桂枝。治柔。生薑。散風邪。桔梗。除風痺。辛。以散之。之劑也。邪之所。

奏其氣必虛佐人參以固衛附子以溫經甘草以和諸藥大棗以助十二經同諸風劑則發中有補爲產後中風非大劑也頸項強急瘕病也加附子以散寒嘔者風擁氣逆也加半夏以散逆

婦人乳中虛煩亂嘔逆安中益氣竹皮大丸主之

胃者水穀氣血之海產後則血氣虛而胃氣逆故煩亂嘔逆

竹皮大丸方

生竹茹 二分 石膏 二分 桂枝 一分

甘草 七分 白薇 一分

右五味。末之。棗肉和丸。彈子大。以飲服一丸。日
三夜二服。有熱者倍白薇。煩喘者加栝實一分。
竹茹甘寒以除嘔哕。石膏辛寒以除煩逆。白薇鹹
寒以治狂惑邪氣。夫寒則泥膈。佐桂枝以宣導。寒
則傷胃。佐甘草以和中有熱倍白薇。白薇鹹寒能
除熱也。煩喘加栝實。栝實辛平能治喘也。用棗肉

爲危者統和諸藥以安中益氣也。

產後下利虛極。白頭翁加甘草阿膠湯主之。

產後旣已血虛下利。又復胃弱。未有不虛極者。白頭翁湯。純苦之劑。堅下焦也。加阿膠以補血。加甘草以和胃。二味佐白頭翁湯。以治產後下利。

白頭翁加甘草阿膠湯方

白頭翁

甘草

阿膠

各二兩

秦皮

黃連

櫟皮

各三兩

右六味。以水七升。煮取二升半。內膠令消盡。分
溫三服。

婦人雜病脉證并治第二十二

婦人中風。七八日。續來寒熱。發作有時。經水適斷。此
爲熱入血室。其血必結。故使如癰狀。發作有時。小柴
胡湯主之。方見嘔吐

婦人傷寒中風。六經傳變。治例與男子同法。唯經
水適來適斷。熱入血室。與夫胎前產後。崩漏帶下。

則治有殊也。婦人經行之際。當血弱氣盡之時。邪氣因入血室。與正氣相搏。則經爲之斷。血爲之結也。血結則邪正分爭。往來寒熱。休作有時。與小柴胡解表裏而散血室之邪熱。

婦人傷寒發熱。經水適來。晝日明了。暮則譫語。如見鬼狀者。此爲熱入血室。治之無犯胃氣。及上二焦。必自愈。

傷寒發熱。又值經水適來之時。則寒邪乘虛而入。

搏於血室。夫邪去陽入陰。則晝日明了。陰被其邪。故暮則譫語。如見鬼狀也。無者。禁止之辭。犯胃氣。以禁下言也。上二焦。以禁汗吐言也。今邪在血室中。則非汗吐下所宜矣。上章以往來寒熱如瘧。故用小柴胡以解其邪。下章以胸脇下滿。如結胸狀。故刺期門以瀉其實。此章則無上下二證。似待其經行血去。邪熱得以隨血出而解也。

婦人中風。發熱惡寒。經水適來。得之七日。熱除脉

身涼和。胸脇滿如結胸狀。譏語者。此爲熱入血室也。當刺期門。隨其實而瀉之。

發熱惡寒。則風邪在表。未入于裏。值經水適來。至七八日。則邪熱乘虛而內入。入則表證罷。故脉遲身涼和也。胸脇者。肝之部分。靈樞經曰。厥陰根於大敦。結於玉英。絡於臆中。其正經則布脇肋。以肝藏血。邪入血室。故令胸脇滿如結胸狀也。肝藏魂。熱搏於陰。故令譏語也。期門者。肝之募。刺之以瀉

其實。

或問曰。熱入血室。何爲而似結胸也。予曰。邪氣傳入經絡。與正氣相搏。上下流行。或遇經水適來適斷。邪氣乘虛而入血室。血爲邪迫。上入肝經。肝受邪則譫語而見鬼。復入臍中。則血結於胸也。何以言之。婦人平居。木當養於木。血當養於肝。方未受孕。則下行之。以爲月水。既孕。則中蓄之。以養胎。及已產。則反經上而爲乳。此皆血也。今邪氣畜血。并

歸肝經。聚於臆中。結於乳下。故手觸之則痛。非湯
劑可及。故當刺期門也。許叔微醫案

陽明病。下血譫語者。此爲熱入血室。但頭汗出。當刺
期門。隨其實而瀉之。漃然汗出則愈。

既下血。則邪熱當隨血去而愈。以譫語則邪熱尚
在血室中。邪熱內陷。不能外出。但薰蒸於頭。而令
頭汗。刺期門以越其熱。則血室之邪。漃然從汗出
而解。

婦人咽中如有炙癭。半夏厚朴湯主之。

半夏厚朴湯方

半夏 一升

厚朴 三兩

茯苓 四兩

生薑 五兩

乾蘓葉 二兩

右五味以水七升煮取四升分溫四服日三夜一服。

咽中如炙癭。千金作咽中帖帖。如有炙肉。吐之不出。吞之不下。以意逆之。當是膏梁肥美所發。逆於

咽中。故令如是。方中皆辛散之劑。用以下逆氣而利咽膈。

婦人藏躁喜悲傷欲哭。象如神靈所作。數欠伸。甘麥大棗湯主之。

藏躁者。心藏虛也。內經曰。心虛則悲。又曰。神不足則悲。夫悲傷則心動。心動則宗脉感而液道開。故令人欲哭。然悲哀太甚。則中氣消。氣消則榮衛不利。故令陰陽相引。而作伸欠也。婦人外無亡憂之

觸而內有悲傷之懷，未有不象神靈所憑者。然邪哭一證，亦屬心虛，詳之中卷。

甘草小麥大棗湯方

甘草 三兩 小麥 一升 大棗 十枚

右三味以水六升，煮取三升，溫分三服，亦補脾氣。

內經曰：悲則心氣急。甘草大棗者，甘以緩諸急也。小麥者，穀之甘者也。靈樞經曰：心病者宜食麥，是

穀先入心矣

婦人吐涎沫。醫反下之。心下即痞。當先治其吐涎沫。小青龍湯主之。涎沫止。乃治痞。瀉心湯主之。

小青龍湯見肺癰
瀉心湯見驚悸

經曰。水在肺。吐涎沫。此水飲在上。而醫反下之。傷其陰血。心下即痞也。先宜小青龍湯以去水。水去則涎沫止。後乃用瀉心湯以治痞。

婦人之病因虛積冷結氣。爲諸經水斷絕。至有歷年

血寒積結胞門。寒傷經絡。凝堅在上。嘔吐涎唾。久成
肺癰。形體損分。在中盤結。繞臍寒疝。或兩脇疼痛。與
藏相連。或結熱中。痛在關元。脉數無澹。肌若魚鱗。時
著男子。非止女身。在下來多。經候不勻。令陰掣痛。少
腹惡寒。或引腰脊。下根氣衝。氣衝急痛。膝脛疼痛。煩奄
忽眩冒。狀如厥癰。或有憂慘。悲傷多嗔。此皆帶下。非
有鬼神。久則羸瘦。脉虛多寒。三十六病。千變萬端。審
脉陰陽。虛實緊弦。行其鍼藥。治危得安。其雖同病。脉

各異源于當辨記勿謂不然。

此條當分作三截看婦人之病必因於虛勞因於

積冷因於結氣

卽結熱

三者皆能爲婦人諸經作

病。夫血得寒則凝況有歷年血寒積在胞門或

在經絡或凝堅於上或盤結於中或外連兩脇或

內連藏府致榮氣不從凝堅而爲肺癰寒氣不散

盤結而爲疝痛形爲之損體爲之傷矣

積冷之爲病者如此

或結熱中痛在關元者以衝脉起於關元爲男子

藏精。女子蓄血之處。熱結於中。則精血消滅。故痛在關元也。脉數則生惡瘡。今脉數爲虛。故不生瘡。但肌膚甲錯。狀若魚鱗。如此傷精損血。卽男子亦有之。非止着於女身也。結熱之爲病者如此在下來多。謂崩

帶之屬。下多則任衝空虛。致經候不勻也。血海虧損。則無以榮養下焦。致陰中掣痛。少腹惡寒也。任脉循脊裏。故有痛引腰脊也。衝脉出於氣街。斜入胸中。循脛骨內。蕪故有下根。氣衝氣衝急痛。膝脛

疼煩也。以其任衝并傷，則奄忽眩冒如厥如癰。如此則氣血無所依附，使人憂慘悲傷。此皆帶下所爲。復申在下來多之義，非有鬼神而令厥癰憂傷也。故久則脉虛多寒，形羸體瘦矣。虛勞之爲病者如此是以婦人有三十六病，下變萬端，不外虛勞積冷結氣。

三者而成。醫人只審其脉之屬陰屬陽，因虛因實，或緊或弦，而用鍼用藥，則危者得安。其有病同脉異，又醫人所當辯記，勿謂不然而可一例以施治。

之也。

問曰婦人年五十。所病下利。數十日不止。暮卽發熱。少腹裏急。腹滿。手掌煩熱。唇口乾燥。何也。師曰。此病屬帶下。何以故。曾經半產。瘀血在少腹不去。何以知之。其證唇口乾燥。故知之。當以溫經湯主之。

婦人年逾七七。則任脉虛。太衝脉衰少。天癸竭。地道不通。今下利。當是下血。下多則亡陰。陰虛則暮發熱也。任衝之脉皆起於少腹。任衝虛。則少腹急。

有乾血則少腹滿也。陰虛不能以濟火。故手掌煩
熱。血虛不足以榮唇口。故唇口乾燥也。婦人五十
而有此病。則屬帶下。以其人曾經半產。猶有乾血
着於小腹不去。故內經曰。任脉爲病。女子則帶下
瘕聚也。既已經半產。則任衝傷。年逾七七。則任衝
竭。任衝之脉。不能以榮唇口。則唇口乾燥。知有瘕
血也。故以溫經湯治之。

溫經湯方

吳茱萸 二兩

當歸

芩藟

芍藥 各二兩

人參

桂枝

阿膠

牡丹皮

生薑 各二兩

甘草 二兩

半夏 半升

麥門冬 一升去心

右三味以水一斗煮取三升分溫三服亦主

婦人少腹寒久不受胎兼取崩中去血或月水

來過多及至期不來。

婦人有瘀血當用前證下瘀血湯今婦人年五十

當天癸竭之時。又非下藥所宜。故以溫藥治之。以血得溫卽行也。經寒者溫以茱萸薑桂。血虛者益以芍藥歸芎。氣虛者補以人參甘草。血枯者潤以阿膠麥冬。半夏用以止帶下。牡丹用以逐堅癥。十二味爲養血溫經之劑。則瘀血自行。而新血自生矣。故亦主不孕崩中。而調月水。

帶下經水不利。少腹滿痛。經一月再見者。土氐根散主之。

帶下者。必胞中有寒。寒則血不行而經水不利。積於少腹。則滿痛也。婦人經水上應太陰之盈虧。下應海潮之朝夕。故月月經行相符而不失其常軌。今經一月再見。則經停積一月不行矣。故用土瓜根散以下積血。

土瓜根散 陰癰腫亦主之

土瓜根

芍藥

桂枝

蟅蟲 各三分

右四味。杵爲散。酒服方寸匕。日三服。

土灰根破瘀血而兼治帶下。故以爲君。蠱蟲下血閉以爲臣。芍藥通順血脈以爲佐。桂枝通行瘀血以爲使。癰疽亦凝血所成。故此方亦治癰腫。

寸口脈弦而大。弦則爲減。大則爲芤。減則爲寒。芤則爲虛。寒虛相搏。此名曰革。婦人則半產漏下。旋覆花湯主之。註詳虛勞

旋覆花湯

旋覆花

三兩

葱

十四莖

新絳

少許

右三味以水三升煮取一升頓服之

旋覆花能補中則無漏下之患葱能安胎則無半產之患絳者紅藍花所染用少許以引入血分也婦人陷經漏下黑不解膠薑湯主之

方缺

血與氣俱行則活而紅血不行則死死則黑也此血凝於下焦故下黑不解膠薑湯者其亦溫經行血劑歟宋校正正是膠艾湯似亦可用

婦人少腹滿如敦狀小便微難而不渴生後者此爲水與血俱結在血室也大黃甘遂湯主之。

敦有形物也是水與血俱結於少腹滿於內而不形於外也小便微難則水飲不行不行則津液不竭故不渴也未生者但利其水生後者必惡露得水寒而結於血室也。

大黃甘遂湯方

大黃 四兩

甘遂 二兩

阿膠 二兩

右三味以水三升。煮取一升。頓服之。其血當下。苦以下結。大黃之苦以下瘀血。甘遂之苦以逐留飲。滑以利竅。阿膠之滑以利小便。爲行水下結血之劑。

婦人經水不利下。抵當湯主之。

抵當湯方

水蛭

三十個

蟅蟲

三十枚

桃仁

二十個

大黃

三兩

酒浸

去翅足

皮尖

右四味爲末。以水五升煮取三升。去滓溫服一升。

蝨蟲水。經之鹹。用以軟血結。桃仁大黃之苦。用以下血結。四物爲下血之駛劑。

婦人經水閉不利。藏堅癰不止。中有乾血。下白物。羆石丸主之。

內經曰。任脉爲病。男子內結七疝。女子帶下瘕聚。以女子不謂之疝。而謂之瘕也。又曰。脾傳之腎。病

名曰疝瘕。少腹寃而痛出白。一名曰蠱。今此證藏
堅癖。豈非瘕聚與疝瘕乎。下白物。豈非帶下與出
白乎。

礬石丸方

礬石 三分燒
杏仁 一分

右二味末之。煉蜜和丸。如棗核大。內藏中。劇者
再內之。

礬石酸。燻燒則質枯。枯燻之品。故神農經以能止

白沃亦瀉以固脫之意也。杏仁者非以止帶以礬石質枯佐杏仁一分以潤之使其同蜜易以爲丸滑潤易以內陰中也。此方專治下白物而設未能攻堅癰下乾血也。

婦人六十二種風及腹中血氣刺痛紅藍花酒主之。
紅藍花酒方

紅藍花 一兩

右一味以酒一大升煎減半。頓服一半。未止再

服。

風者善行而數變。是以百病皆生於風。非止六十二種風也。夫風內至五藏六府。外至腠理肌膚。周身無所不至。故風爲百病之長。人感之重。則有卒中卒倒。輕則內有腸風飧泄。外有癰痺不仁。皆所以傷其榮衛也。紅藍花者。活血行榮。酒性慄悍。通經行衛。則周身內外上下無所不至。其能治六十二種風亦宜矣。紅藍花能治惡血。故及主腹中刺。

痛。

婦人腹中諸疾痛。當歸芍藥散主之。方見妊娠

腹中諸疾痛。必經候不調。當歸芍藥散能養血調經。故亦主之。

婦人腹中痛。小建中湯主之。方見虛勞

中氣虛者。亦作腹痛。小建中湯以補中氣。

問曰。婦人病。飲食如故。煩熱不得卧。而反倚息者。何也。師曰。此名轉胞。不得溺也。以胞系了戾。故致此病。

但利小便則愈宜腎氣丸主之。

病不在上焦則飲食如故以胞系了戾則小便不行而熱亦不得泄故煩熱也靈樞經曰夫不得卧卧而喘者是水氣之客也今婦人轉胞不得溺則水氣無從出故不得卧而倚息也與腎氣丸通腎氣而利小便。

腎氣丸方

熟地黃

八兩

薯蕷

四兩

山茱萸

四兩

澤瀉 三兩

茯苓 三兩

牡丹皮 三兩

桂枝

附子 炮各一兩

右入味末之。煉蜜和丸。如梧子大。酒下十五丸。加至二十五丸。日再服。

腎氣丸者。補腎中真陽而利小便也。以腎與膀胱。為表裏。桂附以益腎中之陽。則陽氣自能開通。溝渠宣行。便溺。脬系自不了戾矣。

婦人陰寒。溫中坐藥。蛇床子散主之。

蛇床子散方

蛇床子仁

右一味末之。以白粉少許。和合相得。如棗大。綿裹內之。自然溫。白粉。卽米粉。藉之以和合也。

蛇床子能令藏熱。故內陰中以溫藏寒。

少陰脉滑而數者。陰中卽生瘰。陰中蝕瘡爛者。狼牙湯洗之。

狼牙湯方

狼牙

三兩

右一味以水四升煮取半升以綿纏筋如繭浸湯瀝陰中日四遍

陰中生瘡腎中有蝕熱也故脉滑而數狼牙味苦寒寒能除腎熱苦能殺蟲治瘡瘍

胃氣下泄陰吹而正喧此穀氣之實也膏髮煎導之

方見黃疸

內經曰胃滿則腸虛腸滿則胃虛更虛更滿則氣

得上下。今胃中穀氣實。則腸中虛。虛則氣不得上下。而腎又不能爲胃關。其氣但走胞門而出於陰戶。膏髮煎者。導小便藥也。使其氣以化小便。則不爲陰吹之證矣。

小兒疳蟲蝕齒方

雄黃

葶藶

右二味末之。取臘日猪脂鎔。以槐枝綿裹頭四五枚。點藥烙之。

小兒胃中有疳熱則蟲生而牙齦蝕爛雄黃味辛
葶藶味苦辛苦能殺蟲故也按張仲景有口齒論
一卷今未之見豈被處簡脫於此耶而婦人方後
不應有小兒方也

雜療方第二十三

以下雜療禁忌瑣碎素亂今釋以小字則開卷瞭然

長服訶梨勒丸方

訶梨勒

陳皮

厚朴 各三兩

右三味末之煉蜜丸如梧子大酒飲服二十丸

加至三十丸。

三味破氣行氣之劑。
不可長服。宜審之。

三物備急方

大黃

一兩

乾薑

一兩

巴豆

一兩。去皮心。
熬外研如脂。

右藥各須精新。先搗大黃乾薑爲末。研巴豆肉

中。合治一千杵。用爲散。蜜和丸。亦佳。密器中貯

之。莫令泄。主心腹諸卒暴百病。若中惡客忤。

心腹脹滿。卒痛如錐刺。氣急口噤。脣尸卒死者。

以煖水若酒服大豆許三四丸或不下捧頭起

灌令下咽須臾當差如未差更與三丸當腹中

鳴卽吐下便差若口噤亦須折齒灌之

備急者療卒暴之病也大黃蕩滌腸胃乾薑溫中散寒巴豆除邪殺鬼故主如上諸證

治傷寒令愈不復紫石寒食散方服乳石人飲食宜寒唯酒宜熱

紫石英

白石英

赤石脂

鍾乳確煉

栝樓根

防風

桔梗

文蛤

鬼口各十分

太一餘糧 十分燒

乾薑

附子

炮去皮

桂枝

去皮各四分

右十三味。杵爲散。酒服方寸匕。

乳石大熱藥。必不宜於傷寒。不可妄用。

救卒死方。

薤搗汁。灌鼻中。

孟詵曰。薤白。雖辛不葷。學道人長服。可通神安。冤鬼。故能辟惡除邪。而救卒死。

救卒死方。

雄鷄冠割取血。管吹內鼻中。

豬脂如鷄子大。苦酒一升。煮沸。灌喉中。

鷄肝及血塗面上。以灰圍四旁。立起。

大豆二七粒。以鷄子白并酒和盡以吞之。

鷄靈禽也。精華皆聚於冠。本乎天者親上也。血乃頂中之陽。肝亦藏中之陽。故能殺邪而治中惡卒死。豬脂能破冷結。苦酒能殺邪毒。故亦主之。大豆殺鬼毒。卵白破醬血。二味藉酒之辛熱。以通行陽氣。亦救中惡卒死。

救卒死而壯熱者方

礬石半斤。以水一斗半。煮消。以漬脚令沒踝。

厥陽獨行。故卒死而壯熱。岐伯曰。血之與氣并走於上。則爲大厥。厥則暴死。礬石收瀉藥也。以之沒足。而收斂其厥逆之氣。

救卒死而目閉者方。

騎牛臨面。搗薤汁灌耳中。吹皂莢末鼻中。立效。

按葛洪肘後方。治卒魘不寤。以青牛蹄。或馬蹄臨人頭上。卽活。則騎牛臨面。係厥惡。驅邪法也。目閉者。邪氣內着也。灌薤汁以辟邪。安魂。吹皂莢以取嚏開竅。

救卒死而張口反折者方。

灸手足兩爪後十四壯了。飲以五毒諸膏散。

灸手足兩爪後。當是灸兩手足爪後。其文則順以十指爪甲爲十二經之終始。灸之以接引陽氣。而回卒死。此惡氣中於太陽。令卒死而開口反張也。五毒諸膏散方未見。

救卒死而四肢不收失便者方

馬屎一升。水三斗。煮取二斗。以洗之。又取牛洞

稀糞

也。

一升。溫酒灌口中。灸心下一寸。臍上三寸。臍下

四寸。各一百壯差。

卒死而四肢不收者。無陽以行四末也。失便者。正氣衰微。不能約束便溺也。物之臭者。皆能解虛殺

邪故以牛馬糞及後條狗糞治之。心下一寸當是上脘穴。臍上三寸當是中脘穴。臍下四寸當是關元穴。灸之以復三焦之陽。而回其垂絕之氣。

救小兒卒死而吐利。不知是何病方。

狗屎一丸。絞取汁灌之。無濕者。水煮乾者取汁。

小兒卒死吐利者。必爲鬼邪客忤。所干狗能辟邪。其糞亦能解毒也。

尸厥脉動而無氣。氣閉不通。故靜而死也。治方。

菖蒲屑內鼻兩孔中吹之。令人以桂屑着舌下。

甲乙經曰。尸厥者。死不知人。脉動如故。傷寒論曰。尸厥者。令人不仁。卽氣閉不通。靜而死之謂也。菖

肅內鼻中以通其肺氣。桂內舌下以開其心竅。心
肺開則上焦之陽自能開發。尸厥之疾可愈也。

尸厥方

剔取左角髮方寸燒末酒和灌令入喉立起。

內經曰邪客於手足少陰太陰足陽明之絡此五
絡皆會於耳中上絡左角五絡皆竭令人身脉皆
動而形無知也其狀若尸厥刺法詳靈樞其治法
以竹管吹其兩耳剔其左角之髮方一寸燔治飲
以藥酒一杯不能飲者灌之立已今仲景亦剔左
角之髮治者以左角爲陽氣之所在五絡之所繡
五絡皆竭故剔其五絡之血餘以治
之和以酒灌者助藥力而行氣血也

救卒死客忤死還魂湯主之方

麻黃

三兩去節

杏仁

七十個去皮尖

甘草

一兩炙

右三味以水八升。煮取三升。去滓分令咽之。通

治諸感忤。

卒死病非中惡則客忤。辛甘能通行陽氣。發散諸邪。故可還魂也。

救卒死客忤死方。

韭根

一把

烏梅

二七個

吳茱萸

半升炒

右三味以水一斗煮之。以病人櫛內中三沸。櫛

浮者生。沉者死。煮取三升。去滓分飲之。

方亦可解。而靜之
浮沉則不可解也。

救自縊死。且至暮。雖已冷。必可治。暮至旦。小難也。恐
此當言。忿氣盛故也。然夏時夜短於晝。又熱。猶應可
治。又云。心下若微溫者。一日已上。猶可治之。方。

徐徐抱解。不得截繩。上下安被卧之。一人以脚踏

其兩肩。手少挽其髮常弦。急也弦勿縱之。一人以

手按揉胸上。導引上焦之氣數動之。一人摩將臂

脛。屈伸之。導引四肢之氣若已僵。但漸漸強屈之。

并按其腹。導引下焦之氣。如此一炊頃。氣從口出。

呼吸眼開。而猶引按莫置。亦勿苦勞之。須臾可少
桂湯。及粥清含之。令濡喉。漸漸能嚥。及稍止。更令
兩人。以兩管吹其兩耳朵。此法最善。無不活者。
凡中暈死。不可使得冷。得冷便死。療之方。

中暈不可得冷。猶被凍不可沃
以熱湯。寒熱拒隔。反爲大害。

屈草帶繞暈人臍。使三兩人溺其中。令溫。亦可用
熱泥和屈草。亦可扣瓦枕底。按及車釭以着暈人。

取令溺。須得流去。此謂道路窮卒無湯。當令溺其中。欲使多人溺。取令溫。若湯便可與之。不可泥及車缸。恐此物冷。喝旣在夏月。得熱泥土。履車缸亦可用也。

救溺死方。

取竈中灰二石餘。以埋人。從頭至足。水出七孔卽活。

右療自縊溺喝之法。并出自張仲景爲之。其意殊絕。殆非尋常所及。本草所能。關係救人之大術也。

傷寒家有暈病非
此遇熱之暈詳之

治馬墜及一切筋骨損方。

大黃 一兩切浸湯炭下
緋帛 如手大燒灰

亂髮 如鷄子大燒灰用
久用炊單布 一尺燒灰

敗蒲 一握三寸
桃仁 四十九個去皮尖熬

甘草 如中指節炙到

右七味以童子小便量多少煎湯成內酒一大
盞次下大黃去滓分溫三服先到敗蒲席半領

煎湯浴衣被蓋覆。斯須通利數行。痛楚立差。利及
浴水亦勿怪。卽瘀血也。

陸馬必筋骨損傷。瘀血凝滯。方中皆逐血行血之
藥。故能下腹中瘀血。敗滿取浴。亦逐肌中瘀血也。

禽獸魚蟲禁忌并治第二十四

凡飲食滋味。以裒於身。食之有妨。反能爲害。自非服
藥煉液。焉能不飲食乎。切見時人不閑調攝。疾疢競
起。若不因食而生。苟全其生。須知切忌者矣。所食之
味。有與病相宜。有與身爲害。若得宜則益體。害則成

疾以此致危。例皆難療。凡煮藥飲汁以解毒者。雖云救急。不可熱飲。凡物之毒者必熱。熱飲則助其毒勢也。諸毒病得熱更甚。宜冷飲之。

肝病禁辛。心病禁鹹。脾病禁酸。肺病禁苦。腎病禁甘。春不食肝。夏不食心。秋不食肺。冬不食腎。四季不食脾。

辯曰。春不食肝者。爲肝氣王。脾氣敗。若食肝。則又補肝。脾氣敗尤甚。不可救。又肝王之時。不可以死氣人。

肝。恐復冤也。若非王時。卽虛以肝補之佳。餘藏準此。

上段以生剋言。下段以禁忌言。六畜六獸。聖人以之養生事死。其食忌亦不可不察。

凡肝藏自不可輕噉。自死者彌甚。

凡畜獸臨殺之時。怨氣聚於肝。食之俱不利於目。故不可輕噉。自死者必疫厲而死。肝毒更甚也。

凡心爲神識所舍。勿食之。使人來生復其對報矣。

畜獸雖異於人。其心亦神識所舍。勿食之。生殺果報。諒不誣也。

凡肉及肝落地不着塵土者。不可食之。猪肉落水

浮者。不可食。

諸肉不乾。火炙而動。見水自動者。不

可食之。六畜肉熱血不斷者。不可食之。諸五藏

及魚投地。塵土不汚者。不可食之。

五者皆涉怪異。食之必有非常之害。

諸肉及魚。若狗不食。鳥不啄者。不可食。

魚肉有毒。禽獸不食。況於人乎。

肉中有如朱點者。不可食之。

朱點者。毒也。色惡不食也。

父母及身本命肉。食之令人神鬼不安。

仁人孝子
當自識之。

食肥肉及熱羹。不可飲冷水。

肥肉熱羹。得冷水則停積不行。

穢飯餒肉臭魚食之皆傷人。

物已敗腐。必不宜於藏府。食之則能傷人。臭惡不食也。

自死肉。口閉者不可食之。

自死既已有毒。口閉則其毒不得出。不可食之。

六畜自死。皆疫死。則有毒。不可食之。

疫氣既能死畜而死畜之肉必能傷人不可食也。

獸自死北首及伏地者食之殺人。

首頭向也。凡獸向殺方以自死及死不僵直斜倒而伏地者皆獸之有靈知故食之殺人。檀公曰：狐死正丘首，樂其生不忘本也。獸豈無靈知者耶？

豹死首山

食生肉飽飲乳變成白蟲。

一作血蟲

生肉非人所食，食生肉而飲乳汁，西北人則有之，脾胃弱者未有不爲蟲爲蠱也。

疫死牛肉食之令病洞下，亦致堅積，宜利藥下之。

疫死牛肉有毒，食之或發爲洞瀉，或留爲堅積，宜下以去之。

臍藏米糲中有毒。及經夏食之。發腎病。

臍藏米糲中。則與下條醬肉不殊。若在夏月。臍必敗腐矣。腐氣入腎。食之發腎病。

治自死六畜肉中毒方。

黃蘗屑搗服方寸匕。

六畜自死。必因毒疫。苦能解毒。黃蘗味之苦者。

治食醬肉漏臍中毒方。

燒犬尿酒服方寸匕。每服人乳汁亦良。飲生韭

汁三升亦得。

醬肉。密器蓋之。隔宿者是也。
漏脯。扉屋漏下沾着者是也。

治黍米中藏乾脯食之中毒方。

大豆濃煮汁。飲數升。卽解。亦治狸肉漏脯等毒。

肘後方云。此亦醬肉也。大豆能解諸毒。故用以治。

治食生肉中毒方。

掘地深三尺。取其下土三升。以水五升。煮數沸。澄

清汁飲一升。卽愈。

三尺以上日糞。三尺以下日土。土能解一切毒。非止解肉毒也。

治六畜鳥獸肝中毒方。

水浸豆豉絞取汁服數升愈。

豆豉爲黑大豆所造能解六畜胎子諸毒。

馬脚無夜眼者不可食之。

夜眼在馬前兩足膝上馬有此能夜行一名附蟬尸。

食駿馬肉不飲酒則殺人。

馬肉苦冷有毒故飲酒以解之孟詵曰食馬肉毒發心悶者飲清酒則解飲濁酒則加。韓非子曰秦繆公亡駿馬見人食之繆公曰食駿馬肉不飲酒者殺人卽飲之酒居三年食駿馬肉者出死力。

解繆公

之圍

馬肉不可熟食。傷人心。

馬屬火。在辰屬午。故熟食則傷心。

馬鞍下肉。食之殺人。

馬鞍下肉。多臭爛。有毒。食之必殺人。

白馬黑頭者。不可食之。

食之令人癩。

白馬青蹄者。不可食之。

虎鈴經曰。白馬青蹄。皆馬毛之利害者。騎之不利人。若食之。必能取害也。

馬肉。純肉共食。飽醉。卧大忌。

馬屬火。而豚屬水。共食。必不相宜。又醉飽而卧。是為大忌也。

驢馬肉。合豬肉。食之。成霍亂。

諸肉雜食。傷損腸胃。掠亂藏府。故成霍亂。

馬肝及毛。不可妄食。中毒害人。

馬肝及毛。皆有大毒。不可妄食。

治馬肝毒中人未死方。馬肝一名懸燧。

雄鼠屎二七粒末之。水和服。日再服。尿尖者是雄。

馬稟火氣而生。火不能生木。故有肝無膽。而木氣不足。故食其肝者死。漢武帝云。食肉無食馬肝。又云。文成食馬肝而死。荀莊云。食馬脂肝。則其毒可知矣。馬食鼠屎。則腹脹。故用鼠屎而治馬肝毒。以鼠子獸。而馬牛獸。物性相制也。

治馬肝毒。

人垢取方寸匕服之佳。

人垢。汗所結也。味鹹有毒。亦以毒解毒之意。

治食馬肉中毒欲死方。

香豉

二兩

杏仁

三兩

右二味蒸一食頃熟杵之服日再服

又方

煮蘆根汁飲之良

香豉解毒杏仁利氣則毒可除
蘆根解諸肉毒

疫死牛或目赤或黃食之大忌

牛疫死而目赤目黃者疫

厲之毒不去也食之大忌

牛肉共豬肉食之必作寸白蟲

牛肉性滯猪肉動風入胃不消釀成濕熱則蟲生也亦有共食而不生蟲者視人之胃氣何如耳

青牛腸不可合犬肉食之

青牛水牛也其腸性溫犬肉性熱溫熱之物不可合食

牛肺從三月至五月其中有蟲如馬尾割去勿食食則損人

春夏之交濕熱蒸鬱牛感草之濕熱則蟲生於胃而緣入肺竅故勿食之

牛羊猪肉皆不得以楮水桑木蒸炙食之令人腹內生蟲

桑楸之本能去風。若以蒸
豕肉食。反致風動。蟲生。

噉蛇牛肉殺人。何以識之。噉蛇者。毛髮向後順者是
也。

治噉蛇牛肉。食之欲死方。

飲人乳汁一升立愈。

又方。

以泔洗頭。飲一升愈。

牛肚細切。以水一斗。煮取一升。緩飲之。大汗出者。

愈。

藏器曰。北人牛瘻。多以蛇從鼻灌之。其肝則獨乳汁能解獨肝牛肉毒。敵蛇牛當是獨肝牛也。以泔洗頭飲者。取頭垢能吐其毒也。以牛肚煮服者。取其同類相親。同氣相求。大發其汗以出其毒也。

治食牛肉中毒方。

甘草煮汁飲之即解。

甘草能解百毒。

羊肉其有宿熱者不可食之。

羊之五藏皆平溫。唯肉屬火而大熱。人稍有熱者不可食之。

羊肉不可共生魚酪食之害人。

生魚鮮之屬酪乳之屬生魚與酪食尚成內癥。加以羊肉食之必不益人也。

羊蹄甲中有珠子白者名羊懸筋食之令人癲。

詳末

白羊黑頭食其腦作腸癰

羊腦有毒食之發風疾損精氣不唯作腸癰也。方書祇用爲外敷藥。

羊肝共生椒食之破人五藏

椒味辛屬金而剋木故不可與羊肝共食。孫真人云最損小兒。

猪肉共羊肝和食之令人心悶

猪肉能閉血脉與羊肝合食則滯氣故令人心悶

猪肉以生胡荽同食爛人臍

胡荽損精神發癰疾猪肉令人乏氣少精發癰疾宜其不可共食若爛臍則不可解

猪脂不可合梅子食之

猪脂反梅子又梅實發臍上痰猪脂亦生痰之物是不可合食

猪肉和葵食之少氣

葵性冷利生痰動風猪肉令人乏氣合食之非止於少氣也

鹿人不可和蒲白作羹食之發惡瘡

鹿肉九月已後至正月已前堪食他月食之則發冷痛蒲白想是蒲筍之類當詳之

麋脂及梅李子若妊婦食之令子青盲男子傷精

麋脂忌梅李故不可合食按麋蹄下有二竅爲夜目淮南子云孕女見麋而子四目今食麋脂而令子青盲物類相感了不可知其於胎教不可不慎也又麋脂能痿陽傷精麋角能興陽益髓何一體中而性治頗異耶

麋肉不可合鰕及生菜梅李果食之皆病人

麋肉十二月至七月食之動氣鰕能動風熱生菜梅李動痰合食之皆令人病

癰疾人不可食熊肉。令終身不愈。

張鼎曰。腹中有積聚寒熱者。食熊肉永不除。

白犬自死。不出舌者。食之害人。

犬死必吐舌。舌不吐出者。必有毒。

食狗鼠餘。令人發癰瘡。

餘。狗鼠之剩食也。其涎毒在食中。人食之。則毒散於筋絡。令發癰瘡。

治食犬肉不消。心下堅。或腹脹。口乾大渴。心急發熱。

妄語如狂。或洞下方。

杏仁 一升合皮熟研用

以沸湯三升。和取汁。分三服。利下肉片大驗。

犬肉畏杏仁。故能治犬肉不消。
近人以之治狂犬咬。皆此意。

婦人妊娠不可食兔肉。山羊肉。及鰲雞鴨。令子無聲。
音。

妊娠食兔肉。則令子缺唇。食羊肉。則令子多熱。食
鰲肉。則令子項短。不令無聲音也。若食犬肉。則令
子無聲音。雞鴨肉。胎產
需以補益。二者不必忌之。

兔肉不可合白雞肉食之。令人面發黃。

兔肉酸冷。白鷄肉酸寒。
合食能停濕。故面發黃。

兔肉着乾薑食之。成霍亂。

兔肉味酸。乾薑味辛。辛能勝酸。故合食之。成霍亂。
陶弘景曰。并不可與橘芥同食。二味亦辛物也。

凡鳥自死。口不閉。翅不合者。不可食之。

鳥自死。必歛翅閉口。若張翅開口。
其死也異。其肉也必毒。不可食之。

諸禽肉肝青者。食之殺人。

青者必毒。物所傷。
故食之能殺人。

鷄有六翮四距者。不可食之。烏鷄白頭者。不可食之。

金匱要略
二者爲鷄中之
怪異不可食之

鷄不可合葫蒜食之滯氣

鷄能動風蒜能動痰
風痰發動則氣壅滯

山鷄不可合鳥獸肉食之

山鷄鷓鴣也小於雉而尾長人多畜之樊中性食
蟲蟻而有毒非唯不可共鳥獸肉同食卽單食亦
在所
忌也

雉肉久食令人瘦

雉肉有小毒發瘡疥生
諸蟲以此則令人瘦

鴨卵不可合鱉肉食之。

鴨卵性寒，發冷氣，鱉肉性冷，亦發冷氣，不可合食。

婦人妊娠，食雀肉，令子淫亂無恥。

雀性最淫。周書云：季秋雀入大水爲蛤。雀不入水，國多淫泆。物類相感，理所必然。妊娠者不可不識也。

雀肉不可合李子食之。

雀肉壯陽益氣，得李子酸漬，則熱性不行，故不可共食。

燕肉勿食，入水爲蛟龍所噉。

淮南子曰燕入水爲蜃蛤故高誘註謂蛟龍嗜燕人食燕者不可入水而祈禱家用燕召龍能興波祈雨故名游波雷公曰海竭江枯投游波而立泛其召龍之說似亦有之也

鳥獸有中毒箭死者其肉有毒解之方

大豆煮汁及鹽汁服之解

箭藥多是射罔毒射罔乃鳥頭所熬大豆汁能解鳥頭毒故也臧能勝熱故鹽亦解其毒

魚頭正白如連珠至脊上食之殺人魚頭中無腮

者不可食之

能殺人詳酉陽雜俎

魚無腸膽者不可食之三年

陰不起女子絕生魚頭似有角者不可食之魚

日合者不可食之。

說文曰魚水蟲也。怪異者不可食。呂氏春秋曰季冬之月命漁師始漁天子乃嘗魚水族之屬古人亦不以爲細事而妄食也。

六甲日勿食鱗甲之物。

六甲日有六甲之神以直日食鱗甲則犯其忌也。

魚不可合鷄肉食之。

今人常合食之亦不見爲害。或飛潛之物合食所當忌耶。或過之不消則魚能動火鷄能動風能令作病耶。

魚不得合鷓鴣肉食之。

鷓鴣食魚物相制而相犯也。不可合食。

鯉魚鮓不可合小豆藿食之。其子不可合猪肝食之。害人。

鯉魚鮓小豆藿味皆醎。醎能勝血。故陶弘景云。合食成消渴。其子合猪肝食傷人神。

鯉魚不可合犬肉食之。

鯉魚犬肉俱令熱中。不可合食。

鯽魚不可合猴雉肉食之。一云不可合猪肝食。

鯽魚同猴雉肉
猪肝食生癰疽

鯽魚合鹿肉生食令人筋甲縮

鯽魚鮎魚也。鯽魚鹿肉皆能治風。
生食反傷其筋脉致令筋甲縮。

青魚鮮不可合生葫荽及生葵并麥醬食之。

青魚鮮不益人。葫荽生葵能動風發瘡疾。必與青
魚鮮不相宜。鮮味醎麥醬亦醎。合食必作消渴。

鱠鱸不可合白犬血食之。

鱠鱸爲無鱗魚。白犬血爲地厭。非唯不可合食。抑
衛生家所當忌也。又鱠鱸善竄能動風。白犬血性
熱能動火。是
不可合食。

龜肉不可合酒菓子食之。

仲景以龜肉忌酒菓子而蘇恭以龜肉釀酒治大風。陶弘景曰：龜多神靈，人不可輕殺，更不可輕噉也。菓子亦不知何菓。

鰲目凹陷者及腹下有王字形者不可食之。

淮南子曰：鰲無耳，以目爲聽。目凹陷則歷年多而神內守，故名曰神守。若有王字則物已靈異矣，食之有害。

其肉不得合鷄鴨子食之。

鰲肉令人患水，鷄子令人動風，鴨子令人氣短，不可合食。

鱖鯪肉不可合莧菜食之。

鱖鯪肉皆反莧菜食之成鱖鯪。

鰕無鬚及腹下通黑者。煮之反白者。不可食之。

無鬚失鰕之形。腹黑必鰕之毒色。白反鰕之色。物既反常。必不可食。

食膾飲乳酪。令人腹中生蟲。爲瘕。

膾乃生魚所作。非胃弱所宜。乳酪之性粘滯。合而食之。則停留於胃。爲瘕爲蟲也。

膾食之在心胸間不化。吐復不出。速下除之。久成瘕病。治之方。

橘皮 一兩

大黃 二兩

朴硝 二兩

右三味以水一大升。煮至小升。頓服卽消。

橘皮能解魚毒

硝黃能下癥瘕

食餚多不消。結爲癥病。治之方。

馬鞭草

右一味搗汁飲之。或以薑棗汁飲之一升。亦

消。又可服吐藥吐之。

馬鞭草味苦寒。下癥瘕。破血。薑棗亦能解魚毒。

食魚後食毒。兩種煩亂治之方。

橘皮

濃煎汁服之即解。

神農經曰橘皮主胸中痰熱逆氣通神明魚毒食毒俱可解。

食鯀鯀魚中毒方。

蘆根

煮汁服之即解。

鯀鯀河豚也河豚畏蘆根故其汁可解其毒。

蟹目相向。足斑目赤者。不可食之。

蟹背眼而相背。相向者。其蟹異。足斑目赤者。其蟹毒。故不可食。

食蟹中毒治之方。

紫蘇

煮汁飲之三升。紫蘇子搗汁飲之亦良。

又方。

冬瓜汁飲二升。食冬瓜亦可。

紫蘇冬瓜并解魚蟹毒。

凡蟹未遇霜多毒。其熟者乃可食之。

未遇霜者。霜降節前也。節前食水蓂若。故有毒。霜降節後。食稻將熟。則熟而味美。乃可食也。蓂若。生水濱。有大毒。

蜘蛛落食中。有毒。勿食之。

蜘蛛有毒。落食中。或有尿。有絲粘食上。故不可食。

凡蜂、蠅、蟲、蟻等。集食上。食之致癩。

蜂、蠅、蟲、蟻。集熱而有毒。集食上。而人食之。濕熱之毒。傳於肌肉。致生癰瘡。

果實菜穀。忌并治第二十五

果子生食生瘡。

諸果之實皆熟於夏秋。瘡濕熱之實。食之散令生瘡。

果子落地經宿。蟻食之者。人大忌食之。

落地經宿則果壞。蟻食之則果毒在人。大忌食之。令人患九漏。

生米停窖日多。有損處食之傷人。

有損處。謂為蟲鼠所食。皆有毒。故傷人。

桃子多食。令人熱。仍不得入水浴。令人病寒熱淋瀝病。

桃實酸甘辛。生於春則味酸。成於夏則味甘。成於秋則酸辛。其性熱。故多食令人熱也。若多食而人水浴。則酸味不得內泄。多令人癢。水寒之氣。因而外客。故令人寒熱也。

杏酪不熟傷人。

古人杏酪以酒蜜釀成。亦有甘草生薑汁熬成者。以杏仁有毒。半生半熟皆能害人也。

今人另有製法。

梅多食壞人齒。

梅實能致津液。津液出則骨傷。以腎主五液。齒爲腎之標故也。

李不可多食。令人臃脹。

李實味酸澁。多食則中氣不行。而令臃脹。

林禽不可多食。令人百脉弱。

林禽酸濇而閉百脉。故多食令人百脉弱。

橘柚多食。令人口爽。不知五味。

橘柚味酸。能惡膈生痰。聚飲飲聚膈上。則令口淡。不知味。

梨不可多食。令人寒中。金瘡產婦亦不宜食。

梨性大寒。故令人寒中。寒能凝血脉。故金瘡產婦不宜食之。

櫻桃杏多食傷筋骨。

櫻杏性熱
銷鑠筋骨

安石榴不可多食。損人肺。

安石榴酸澇。多食則上焦
之氣澇。以收而肺氣損。

胡桃不可多食。令人動痰飲。

胡桃能潤肺消痰。今令人動痰飲。何也。以
胡桃性熱。多食則煎熬津液。而為痰飲矣。

生棗多食。令人熱渴氣脹。寒熱羸弱者。彌不可食。傷

人。

生棗味甘辛氣熱。以辛熱則令人渴。甘則令人氣
脹也。羸弱者。內熱必盛。而脾胃必虛。故彌不可食。

食諸果中毒治之方。

猪骨 燒過

右一味末之。水服方寸匕。亦治馬肝漏脯等毒。

猪骨治諸果毒。亦治馬肝漏脯毒。其義不可曉。

木耳赤色及仰生者勿食。菌仰卷及赤色者不可食。

木耳諸菌皆覆卷。仰卷則變異。色赤則有毒。故不可食。巢元方曰。菌菌之屬。并是鬱蒸濕氣變化所生。有毒。食之多致死。不死者。亦煩悶吐利。良久乃醒也。

食諸菌中毒悶亂欲死治方。

人糞汁飲一升。

土漿飲一二升。

大豆濃煮汁飲之。

服諸吐利藥并解。

人糞土漿豆汁俱能解毒。或吐利以解其毒。

食楓樹菌而笑不止治之以前方。

弘景曰。楓木上生者。令人笑不止。以地漿解之。

誤食野芋。煩毒欲死。治之以前方。

其野芋根山東人名魁芋。人種芋三

年不收亦成野芋。并殺人。

野芋三年不收。又名招芋。味辛冷有毒。只可敷摩瘡腫。人若食之。中其毒。土漿豆汁糞汁俱可解也。蜀椒閉口者有毒。誤食之。戟人咽喉。氣病欲絕。或吐下白沫。身體痺冷。急治之方。

肉桂煮汁飲之。多飲冷水一二升。或食蒜。

或飲地漿。或濃煮豉汁飲之。并解。

蜀椒氣大熱有毒。味辛麻。閉口者毒更甚。辛則戟人咽喉。麻則令人吐下白沫。身體痺冷。地冷水地漿豉汁寒涼。能解熱毒。其桂蒜大熱。而肘後諸方亦云能解椒毒。不知其義。豈因其氣微絕。身體冷痺而用耶。

正月勿食生葱令人面生游風

正月甲木始生人氣始發葱能走頭面而通陽氣反引風邪而病頭面故令生游風

二月勿食蓼傷人腎

扁鵲云食蓼損髓少氣減精二月木正王若食蓼以傷腎水則木不生故二月勿食

三月勿食小蒜傷人志性

小蒜辛熱有毒三月爲陽氣長養之時不可食此奪氣傷神之物

四月八月勿食胡荽傷人神

胡荽葷菜也辛芳之氣損人精神四月心火正王八月肺金將斂以心藏神而肺藏鬼食此走散之

物必能
傷神也。

五月勿食韭令人乏氣力。

韭菜春食則香夏食則臭脾惡
臭而主四肢是以令人乏氣力。

五月五日勿食一切生菜發百病。

五月五日爲天中節爲純陽日人當養陽
以順令節若食生菜則伐天和故生百病。

六月七月勿食茱萸傷神氣。

六七月陽氣盡發吳茱萸
辛熱辛能走氣故傷神氣。

八月九月勿食薑傷人神。

八九月人氣收斂。薑味辛發食之則傷神也。雲笈七籤曰。九月食生薑成病。孫真人曰。八九月食薑至春多患眼。損筋力。減壽。米廩菴有秋薑。天人天年之語。謂其辛走氣瀉肺也。

十月勿食椒。損人心傷心脉。

內經曰。九月十月人氣在心。椒能走氣傷心。故傷心脉。

十一月十二月勿食薤。令人多涕唾。

薤白氣味冷滑。能引涕唾。非獨十一月十二月然也。

四季勿食生葵。令人飲食不化。發百病。非但食中藥中皆不可用。深宜慎之。

脾王四季生葵冷滑非脾所宜
發病之物藥餌中皆不宜也

時病差未健食生菜手足必腫

時病熱病也熱病新差而脾胃尚
弱食生菜則傷脾故令手足浮腫

夜食生菜不利人

夜食生菜則易停滯而
難轉化不利於人也

十月勿食被霜生菜令人面無光目澁心痛腰疼或
發心瘡瘡發時手足十指爪皆青困委

道藏云六陰之月萬物至此歸根復命以待來復
不可食寒冷以伐天和生菜性冷經霜則寒寒冷

之物能損陽氣。
食之能發上證。

葱韭初生芽者食之傷人心氣。

萌芽含抑鬱之氣未
伸食之能傷心氣。

飲白酒食生韭令人病增。

飲白酒而食生韭則神昏目
暗故寇宗奭曰酒後尤甚。

生葱不可共蜜食之殺人獨顆蒜彌甚。

孫真人曰葱同蜜食令人利下。
獨蒜氣味辛臭與蜜更不宜也。

棗合生葱食之令人病。

素與葱食令人五藏不和

生葱和雄鷄雉白犬肉食之令人七竅經年流血

葱性熱鷄雉犬肉皆動風熱熱傷血脉故也

食糖蜜後四日內食生葱韭令人心痛

蜜與葱韭蒜皆相反雖食蜜後四日內尤忌之相犯仍令人心痛

夜食諸薑蒜葱等傷人心

人之氣晝行於陽而夜行於陰夜食辛物以擾乎陽則傷上焦心膈之陽氣也

燕薺根多食令人氣脹

蕪菁。卽蔓菁也。多食動氣。

薤不可共牛肉作羹食之。成痕病。韭亦然。

薤韭牛肉皆難消化之物。積而不消。則爲癥瘕。

蓴多食動痔疾。

李廷飛曰。蓴性滑。故發痔疾。

野苣不可同蜜食之。作內痔。

野苣。苦蕒也。性苦寒。能治痔。與蜜同食。復生內痔。物性相忌。則易其性也。

白苣不可共酪同食。作隱蟲。

白苣苦寒。乳酪甘寒。合食停於胃中。則生蝕。蠱。

黃瓜食之發熱病。

黃瓜動寒熱虛熱。天行熱病後皆不可食。

葵心不可食。傷人。葉尤冷。其背赤莖者勿食之。

葵心有毒。其葉黃背赤莖者亦有毒。不可食。

胡荽久食之令人多忘。

胡荽開心竅傷神。久食之故令人多忘。

病人不可食胡荽及黃花菜。

胡荽發痼疾黃花菜

苦寒皆不利病人

芋不可多食動病

芋難克化
滯氣困脾

妊娠食薑令子餘指

餘指六指也薑形如
列指物性相感也

蓼多食發心病
蓼和生魚食之令人奪氣陰核疼
痛

孫真人曰黃帝云食蓼過多有毒發心痛以氣味
辛溫故也生魚鮮之屬合食則相犯令人脫氣陰

核痛。

芥菜不可共兔肉食之。成惡邪病。

芥菜。昏人眼目。兔肉傷人神氣。合食必爲惡邪之病。

小蒜多食傷人心力。

小蒜辛溫。有小毒。發痼疾。多食氣散。則傷心力。

食躁或躁方。

豉濃煮汁飲之。

豉汁雖能解毒。而躁字有誤。

鉤吻與芹菜相似。誤食之殺人。解之方。

薺花 八兩

右一味。水六升。煮取二升。分溫二服。

鉤吻生地傍。無他草其莖有毛。以此別之。

菜中有水蓼若葉圓而光有毒。誤食之令人狂亂。狀如中風。

甘草煮汁服之即解。

薺花甘草
解百藥毒

春秋二時龍帶精入芹菜中。人偶食之。爲病。發時手背腹滿痛不可忍。名蛟龍病。治之方。

硬糖 二三升

右一味。日兩度服之。吐出如蜥蜴三五枚。差。

芹菜生江湖陂澤之涯。蛟龍雖云變化莫測。其精那能入此。大抵是蜥蜴。應蛇之類。春夏之交。遺精於此故耳。且蛇嗜芹。尤爲可證。按外臺秘要云。蛟龍子生在芹菜上。食之入腹。變成龍子。須慎之。飴糗米杏仁乳餅煮粥食之。吐出蛟子大驗。仲景用硬糖治之。余考之本草。并無硬糖。當是粳米飴糖無疑。二物味且甘。能解毒故也。

食苦瓠中毒治之方

黍穰

煮汁數服之解

苦瓠。匏也。詩云。匏有苦葉。國語云。苦瓠不材。於人共濟而已。此苦瓠也。黍穰能解苦瓠毒者。風俗通云。燒穰可以殺蠹。或云。種瓠之家不燒穰。種瓜之家不燒漆。物性相畏也。人食苦瓠過分。吐利不止者。以黍穰汁解之。本諸此。

扁豆寒熱者不可食之

扁豆微補。患寒熱者不可食。

久食小豆令人枯燥。

小豆逐津液利小便津液消滅故令肌膚枯燥。

食大豆屑忌噉猪肉。

大豆壅氣。猪肉滯膈。故忌之。小兒十歲以下尤忌。

大麥久食令人作癰。

大麥下氣。久食令手足痿弱而體癯。

白黍米不可同饔蜜食。亦不可合葵食之。

黍米令人煩熱。饔蜜令人中滿。故不可同食。黍米合葵食成癰疾。亦不可合食。

養麥麵多食之令人髮落。

收字有誤
當詳之

鹽多食傷人肺。

鹽味鹹能傷腎又傷肺多
食發哮喘爲終身痼疾也

食冷物水人齒。

食熱物勿飲冷水。

寒熱相
搏也

飲酒食生蒼耳令人心痛。

此月有刺有毒飲酒食
之必留於胃脘而作痛

夏月大醉汗流不得冷水洗着身及使扇即成病

夏月大醉汗流浴冷水即
成黃汗易取涼即成漏風

飲酒大醉灸腹背令人腸結

毋灸大醉人此灸
家所必避忌也

醉後勿飽食發寒熱

大醉則肝浮膽橫大飽則
筋脈橫解因有寒熱之病

飲酒食猪肉卧秫稻稌中則發黃

飲酒而食肉則腠理開。卧稻穰中則濕熱入。是以發黃也。

食飽多飲酒大忌。

酒家

忌甘

凡酒及水。照見人影動者。不可飲之。

此涉怪異。宜不可飲。

醋合酪食之。令人血瘕。

醋酸飲而酪沾滯。令作血瘕。

食白米粥。勿食生蒼耳。成走注。

白米粥能利小便。蒼耳子能搜風。小便利而食搜風之物。虛其經絡。反致走注疼痛。食甜粥已。食鹽即吐。

甘者令人中滿。食甜物必泥於腸上。隨食以鹽。得鹹則涌泄也。

岸角筋攪飲食沫出。及澆地墳起者。食之殺人。

岸食百草之毒。及衆木之棘。而知飲食之毒。若攪飲食白沫出者。必有毒也。澆地墳起者。怪異也。不可食。

飲食中毒煩滿治之方

苦參 三兩

苦酒 一升半

右二味。煮三沸。三上三下。服之。吐食出。即差。
酸苦。涌泄。爲陰。苦參之。苦。苦酒。
之酸。所以涌泄。煩滿。而除食毒。
又方。

犀角湯亦佳。

犀角亦
解食毒。

貪食。食多不消。心腹堅滿。痛。治之方。

鹽 一升
水 三升

右二味。煮令鹽消。分三服。當吐出食。便差。

鹹味涌泄鹽水
以越心腹堅滿

礬石生入腹破人心肝亦禁水

礬石傷骨蝕肉內用必傷心肝
也礬石得水則化故亦禁水

商陸以水服殺人

商陸有大毒能行水而忌水服物性相惡而然也
故方家多以爲外敷藥亦人所不輕用者

葶藶子傳頭瘡藥氣入腦殺人

葶藶大寒雖能傳頭瘡殺蟲
若寒氣攻腦亦能害人也

水銀入人耳及六畜等皆死以金銀着耳邊水銀則

吐。

水銀有大毒。入耳則沉經墜絡。皆能死人。以金銀着耳邊引之。則水銀吐出。此同類易施功。若非類則難爲巧也。

苦練無子者殺人。

苦練有雌雄兩種。雄者無子。根赤有毒。服之使人吐不能止。時有至死者。雌者有子。根白微毒。可入藥用。

凡諸毒多是假毒以投無知。時宜煮甘草薺芫汁飲之。通除諸毒藥。

凡諸毒多是借飲食
知時時煮甘草薤白
毒也

以按毒而服毒之人原自不
飲之以二物能解草石百